

Mei
2009

	Telefoon	Faks
Hermanus	028 313 8000	028 313 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445

24 Uur Beheerkamer Brandweer	028 313 8000/8111 028 312 2400
---------------------------------	-----------------------------------

Bulletin

Amptelike nuusbrief van Munisipaliteit Overstrand

OPER HAND VIR DIE ARMES KOSTEVERHALINGSBEGINSEL IMPAKTEER OP TARIWE

Verhogings in eiendomsbelasting van slegs 4 persent op residensiële eiendom en 7 persent op kommersiële eiendom en 'n oper hand om die armes en pensioen-trekkers te help is van die hoogtepunte in Munisipaliteit Overstrand se konsep-begroting vir 2009/2010, wat op 30 Maart 2009 vir openbare deelname vrygestel is. Finale goedkeuring sal op 27 Mei 2009 plaasvind.

Voorsiening is egter gemaak vir 'n skerp styging van 40 persent in die koste van elektrisiteit, en inwoners kan verwag om heelwat meer te betaal vir dienste wat in die verlede kruisgesubsidieer is. Werklike koste van dienste sal in die nuwe tariewe gedek word.

Die totale begroting vir 2009/10 beloop R642 miljoen – R490 miljoen aan die bedryfskant en R152 miljoen vir kapitale projekte – wat volgens vooruitskattings in die begrotingsdokumente effens laer is as hierdie jaar s'n.

By die tertafellegging het Uitvoerende Burgemeester Theo Beyleveldt gesê dit was 'n moeilike begroting om op te stel gegewe die omstandighede van die wêreldwye ekonomiese resessie en die behoefte om inwoners waarde vir hul geld te gee. Bekostigbaarheid en die welsyn van die gemeenskap is vooropgestel in 'n poging om dienste doeltreffend te lewer. Die aangeleentheid is verder gekom-

pliseer deur die feit dat die verwagte skerp styging in elektrisiteitskoste, wat 'n impak op alle munisipale dienste gaan hê, nog nie bekend is nie.

Ondanks hierdie faktore is hy van mening dat die begroting goed beplan is en is hy ingenome daarmee dat die verhogings in eiendomsbelasting tot 4 persent op residensiële grond en verbeterings en 7 persent op kommersiële grond en verbeterings beperk kon word wat op 'n gemiddelde verhoging van 5 persent op eiendomsbelasting neerkom.

In hierdie verband is daar goeie nuus vir die armes en bejaardes. Die munisipaliteit het die huishoudelike inkomstedrempel om vir kortings van 30 of 40 persent te kwalifiseer van twee maal 'n maatskaplike staatspensioen tot drie maal verhoog en die drempel vir elektrisiteitsverbruik van 350 eenhede tot 400 eenhede. Vir 'n korting van 20 persent is die inkomstedrempel na ses keer 'n maatskaplike pensioen verhoog, onderworpe aan sekere voorwaardes. 'n Nuwe kategorie vir hulp-behoewendes is geskep vir diegene wat nie ten opsigte van hul water- en elektrisiteitsverbruik kwalifiseer nie sodat hulle vir gesubsidieerde riolering- en afval-verwyderingsdienste oorweeg kan word.

Daar word gehoop dat die munisipaliteit deur hierdie maatreëls in staat sal wees om mense te help wat finansiële swaarkry.



GRYSKRAGPROJEK KRY HUPSTOOT

Projek Gryskrag, Munisipaliteit Overstrand se baanbrekerplan om die gaping tussen die vaardighede en kennis van die area se afgetredenes en die eksperimentele behoeftes van jong graduandi of studente in hul finale jare te oorbrug, het 'n finansiële hupstootjie van ABSA se Korporatiewe en Handelsbankafdeling gekry. Mnr Bonisile Magewu, een van ABSA se verhoudingsbestuurders, het op Woensdag 18 Maart 2009 'n tjek van R30 000 aan die Uitvoerende Burgemeester, rdl Theo Beyleveldt, oorhandig wat gebruik moet word om studente te vergoed wat vir die deurloping van mentorskapprogramme deur die munisipaliteit opgeneem word. Die geleentheid is ook bygewoon deur mnr Hugo Lambrechts, ABSA se hoof van Openbare Sektor-verhoudingsbestuurders, en mnr Werner Zybrands, Munisipale Bestuurder. Mnr Magewu het gesê dat ABSA dit opwindend vind om deel van die projek te wees en dat dit die projek as 'n baie belangrike inisiatief beskou waardeur die vaardigheidstekorte in die land onder die loep geneem kan word. "Ons glo dat hierdie briljante projek vrugtevolle uitkomst sal hê en dat dit 'n model sal skep wat deur ander munisipaliteite nagevolg kan word." Mense wat graag meer te wete wil kom, kan me Lucinda Bucchianeri, projekbestuurder, by 028 313 8120 of mnr Jaap van Staden (self 'n gryskrag-diensverskaffer) by 0832592940 skakel.

BAARDSKEERDERSBOS TROTS OP SENTRUM

Met die amptelike opening van Baardskeerdersbos se splinternuwe gemeenskapsentrum op Donderdag 19 Maart 2009 is daar nou vyf dinge waarop hierdie klein landelike gemeenskap baie trots is.

Volgens mnr Hennie Vermeulen, voorsitter van die Baardskeerdersbos-inwonersvereniging, is die ander vier benewens die nuwe bymekaarkompleks:

- Die 90-jarige Groenewald-tweeling, Enna en Henna, wat die dorp se oudste inwoners is en nog altyd hier gewoon het;
- Die Baardskeerdersbosorkes, wat een van die voorste boeremusiek-groepe in die land is;
- Die groot getal kunstenaars wat hulle in die laaste tyd hier gevestig het en ook 'n kunstenaarsroete as toeriste-atraksie tot stand gebring het; en
- Die dorp se historiese kerk en die jaarlikse kerkbasaar wat mense van heinde en verre lok.

Mnr Vermeulen het die Munisipaliteit Overstrand bedank vir die puik dienslewering wat Baardskeerdersbos geniet en bygevoeg dat die nuwe saal nie net 'n



Baardskeerdersbos se nuwe gemeenskapsaal met Overstrand-burgemeester Theo Beyleveldt in die voorgrond.

aanwins vir die gemeenskap is nie maar ook 'n ernstige probleem opgelos het. Voor die munisipaliteit die terrein gekoop het, was dit 'n stortingsplek waar selfs 'n vrot beeskarkas weggegooi is.

"Dit toon dat die munisipaliteit nie net na die groter

sentra omsien nie maar ook die belange van klein gemeenskappe op die hart dra," het hy gesê. Hy het die wyksraadslid, mnr Pieter Scholtz, en die areabestuurder, mnr Kat Myburgh, vir aanprysing uitgesonder.

Overstrand-burgemeester Theo Beyleveldt het gesê die waardigheid van inwoners is vir die Raad belangrik en dat gemeenskapsentrums in dié opsig 'n groot rol speel. Dit bring mense bymekaar en skep die geriewe vir goeie buurmanskap, het die Burgemeester gesê. In die afgelope drie jaar is 16 gemeenskapsentrums gebou of opgegradeer.

Mev Claudette Barnes het beaam dat die saal 'n groot rol gaan speel in die werksaamhede van die Baardskeerdersbos-gemeenskapsontwikkelingsprojek, veral om die kinders van die omgewing skoolgereed te kry. Die tempo waarteen hulle reeds op 'n vroeë stadium uitgesak het, was in die verlede onaantoonbaar hoog. Die selfvertroue waarmee die kinders tydens die opening in sang-en-bewegingsitems opgetree het, het van dié projek se goeie werk getuig.



Foto: Sharief Jaffer, Kaap-Rapport

HERMANUS GEKROON AS DORP VAN DIE JAAR

Hermanus is aangewys as die wenner van die gesogte Kaap-Rapport Dorp-van-die-Jaar-kompetisie, en op 27 Maart het Calvyn Giffellan, uitvoerende hoof van Cape Town Routes Unlimited, een van die medeborge, die trofee tydens 'n uithanggeleentheid aan Burgemeester Theo Beylveveldt oorhandig. Mnr Beylveveldt meen die dorp se sukses lê in dit wat gedoen word om die gemeenskap tevrede te stel. Die Munisipaliteit se visie om 'n sentrum van uitnemendheid vir sy gemeenskappe te wees, word deur uitnemende mense in die gemeenskap ondersteun. Daar word hard gewerk om geleenthede vir almal te skep, onder meer deur Whalecoast Marketing en die Overstrandse Agentskap vir Plaaslike Ekonomiese Ontwikkeling (OLEDA), aan wie die munisipaliteit gesamentlik R5 miljoen per jaar vir hul werksaamhede toeken. Ook in die nasionale en provinsiale Vuna-kompetisie het dié plaaslike owerheid se dienslewering aan die burgerlike samelewing groot lof verdien. Kortom, by ontvangs van die trofee, het die Burgemeester dalk 'n baie ware woord gespreek: "Overstrand is die plek om te leef en te groei."

MORELESTANDAARDE-INISIATIEF: NR2

DIE WAARDE VAN RESPEK

In ons ondersteuning van die Morelestandaarde-inisiatief (MSI) het ons die waarde van BETROUBAARHEID in die Maart-uitgawe van hierdie Bulletin in oënskou geneem. Dit doen ons goed om te sien dat bewustheid van hierdie inisiatief klaarblyklik onder ons gemeenskap aan die toeneem is. Die impak behoort in momentum toe te neem wanneer die program einde April 2009 in skole bekendgestel word.

Hierdie maand val die fokus op RESPEK as die tweede van die MSI se ses kernwaardes. Die ander wat gaan volg is Verantwoordelikheid, Regverdigheid, Omgee en Goeie Burgerskap. Ons weet almal dat respek iets is wat verdien moet word. Met dieselfde mate waartoe jy respek toon, verdien jy respek. Dit geld nie net vir individue nie maar ook vir ons as 'n gemeenskap.

Ervaar besoekers of ons as inwoners dat respek 'n deurlopende waarde in die kultuur van ons gemeenskap is?

'n Kultuur van respek sal weerspieël word in die hoflikheid en bedagsaamheid waarmee mense in ons winkels en sake-ondernemings en deur die amptenare in alle vertakings van die staatsdiens bedien word. Dit sal blyk uit die manier waarop padgebruikers hulle gedra en verdraagsaam is teenoor ander en die reëls gehoorsaam. Dit sal weerspieël word in die netheid van ons paale, sypaadjies, parke en ander openbare fasiliteite en hoe ons vir ons pragtige natuurlike omgewing sorg.

In hoe 'n mate voldoen ons hieraan?

As 'n gemeenskap mag ons nie faal in ons strewe om die respek te verdien van almal wat hier woon of hier besoek afleë nie. Om dit te doen, moet ons met respek teenoor mekaar en teenoor ons omgewing optree.

Op plaaslike regeringsvlak is ons daartoe verbind om ons kant te bring sodat die waarde van respek 'n beduidende onderdeel van ons gemeenskapskultuur word. Ons doen 'n beroep op alle inwoners om dieselfde te doen!

Maar, soos in die geval van Betroubaarheid as waarde, begin dit by ons en in ons huise. Die waarde van RESPEK lê binne elkeen van ons, en dit is 'n persoonlike verantwoordelikheid om hierdie waarde te koester en dit te verdien deur dit te toon. Ons moet bedagsaamheid en beleefdheid aan die dag lê en respek vir die regte en outonomie van ander toon en bereid wees om alle konflik vreedsaam op te los. Ons moet aan ander doen wat ons aan onself gedoen wil hê. Slegs dan kan ons gesamentlik aan 'n kultuur van respek bou en dit op ons beurt verdien.

Dit is die uitdaging. Kom ons maak werk daarvan!

Nadere besonderhede kan verkry word deur Ernst Kretschmer by 082 412 4538 of Ronel Mostert by 082 470 3975 te kontak. Finansiële bydraes is welkom en kan in die rekening van die Hermanus-transformasievereniging by Nedbank se Hermanus-tak gedeponeer word. Die rekeningnommer is 1345027931.

"WHEELS & RUNNERS"-RESIES OP 9 MEI

Die derde "Wheels & Runners"-resies, die enigste ten volle geïntegreerde byeenkoms vir wiede en hardlopers in Suid-Afrika, gaan op Saterdag, 9 Mei in Hermanus gehou word.

Die resies se visie is om alle gemeenskappe bewus te maak van die vermoëns en behoeftes van mense met gestremdhede wat van rolstoel gebruik maak en om diensverskaffers en hierdie gemeenskappe aan te moedig om daarna te streef om fasiliteite en geleenthede gestremd-vriendelik en inklusief vir alle lede van die gemeenskap te maak.

Die resies gaan tussen 09:00 en 11:45 gehou word, en die BEGIN/EINDPUNT sal die Kerk se parkeerarea in Hoofstraat wees. Inligting rakende die roete en SSG-verkeersreëlings kan op die roetekaarte en die webwerf www.hermanusrace.co.za verkry word.

Die publiek word hartlik uitgenooi om aan die Pretstap deel te neem en om rolstoel, kinderwaentjies of stookkarretjies, trollies, tuisgemaakte sierwaens, vlotte, ensovoorts te gebruik. Assistentie sal toegelaat word om rolstoel of enige ander "vervoermiddel" met wiede te stoot, of hoekom stoot jy nie jouself nie? Sake-ondernemings word genooi om in te skryf en hulle ondernemings met logo's te adverteer of 'n vlot te bou wat hulle diens of onderneming die beste sal uitbeeld.

Vir meer inligting, skakel asseblief 028 312 1889 of faks 086 6090 932 of epos info@hermanusrace.co.za

WÊRELDOMGEWINGSKALENDER: NO 3

INDRINGERPLANTE HOU BEDREIGING VIR BIODIVERSITEIT IN

Op 22 Mei word die Internasionale Dag vir Biologiese Diversiteit herdenk. Het jy geweet dat daar soveel as 100 miljoen spesies op Aarde is, waarvan slegs 1.7 miljoen geïdentifiseer is, en dat wetenskaplikes raam dat tussen 150 en 200 spesies van lewe elke 24 uur uitgewis word?

Die term "biodiversiteit" is 'n moderne gonswoord. Dit is die term wat gegee word aan die verskeidenheid van lewe op die planeet Aarde asook die patrone wat hierdeur gevorm word. Gewoonlik dink ons hieraan in terme van die verskeidenheid plante en diere, maar dit omvat ook genetiese verskille binne 'n spesie en die verskeidenheid ekosistels wat aangetref kan word.

Ten tye van die Wêreldberaad wat in 1992 in Rio de Janeiro gehou is, het wêreldleiers op 'n strategie vir volhoubare ontwikkeling ooreengekom. Een van die ooreenkomste wat tydens die beraad onderteken is, was die Konvensie oor Biologiese Diversiteit. Hierdie ooreenkoms tussen die wêreld se grootste regerings sit uiteen hoe hulle hul daartoe verbind om ekologiese integriteit na te streef onderwyl daar aan ekonomiese ontwikkeling gewerk word. Meer as 150 state (insluitend Suid-Afrika) het dié dokument by die Rio-beraad onderteken, en sedertdien het meer as 187 lande die ooreenkoms bekragtig. Van die grootste belang is dat die Konvensie besluitnemers daaraan herinner dat natuurlike hulpbronne nie onuitputbaar is nie onderwyl dit ook 'n nuwe filosofie vir die 21ste eeu uiteensit

– 'n filosofie van volhoubare gebruik.

Die tema vir Internasionale Biologiese Diversiteit in 2009 is uitheemse indringerspesies. Hulle hou een van die grootste bedreigings vir biodiversiteit in, soos ons hier in Overstrand maar al te goed weet want 'n menigte uitheemse indringerplant spesies wat hier voorkom, bedreig ons kosbare fynbos-ekosistels. Indien 'n nuwe spesie 'n habitat soortgelyk aan sy oorspronklike habitat kan vind waar dit gevoed word en kan reproduseer, is die moontlikheid dat dit sal oorleef groot. Om as 'n indringer gereken te word, moet so 'n spesie die vermoë hê om die oorhand oor inheemse spesies te verkry sover dit meedinging om kos en habitat aangaan wat aanleiding gee tot uitgebreide introdusering in nuwe omgewings waar dit in getalle kan toeneem en ekosistels kan skaad.

Volgens die Wêreldhulpbronne-instituut is die grootste oorsaak van uitwissing 'n verlies aan habitat. Selfs in die Overstrand-streek het die verlies aan habitat weens ontwikkelingsdruk en faktore soos uitheemse indringer-investering 'n impak op ons biodiversiteit. Ons moet die bewaring en, waar moontlik, herstel van ons biodiversiteit vooropstel tot so 'n mate dat dit gemeenskapsbetrokkenheid in die hand werk en voordele vir beide die huidige en toekomstige burgers van die Overstrand-streek inhou. Skakel Willemien Swanepoel van die Departement Omgewingsbewaring by 028 313 8100 om meer besonderhede te verkry.



Hawstonstrand, 'n ongerepte marine-ekosistels

DO YOU PREFER THIS NEWSLETTER IN ANOTHER OFFICIAL LANGUAGE?

SMS your account number with E for English to 082 338 1631 or contact your nearest client service officer

UNGATHANDA LENCWADI YESAZISO-NDABA IBHALWE NGOLUNYE ULWIMI?

Thumela i-SMS enenombolo ye-akhawunti yakho kunye no X omele isi Xhosa kule nombolo 082 338 1631

NASIONALE BEDROG BLITSLYN
0800 701 701